

[TRANSLATION.]

1899.

NIU TIRENI.

KOMITI MO NGA MEA MAORI:

PIRE E MEATIA ANA KIA MAHIA HEI WHAKANOHONOHO KI TE TANGATA
HEI WHAKAHAERE HOKI I NGA WHENUA MAORI.(NGA KORERO I KOREROTIA KI TE AROARO O TE KOMITI MO NGA PITIHANA E PA ANA KI
TAUA MEA.)

TE AUHANA, TIAMANA (MR. R. M. HOUSTON, CHAIRMAN).

[Hei roanga atu tenei mo I.-3A., 1898.]

Pitihana No. 303.—Na HENARE KAIHAU i tuku ki te Whare.

Ki te Honore Pika me nga Mema Honore o te Whare o Raro e noho huihui
ana i roto i te Paremete.

Te pitihana a nga Maori e mau ake nei nga ingoa e ata whakaatu ana :—

1. Ko nga kai-pitihana he tangata Maori no Nui Tireni, he mea whiriwhiri e nga hapu e nga iwi o roto i te Takiwa o te Tai Hauauru hei hari mai ki o koutou aroaro i nga tino mamae me nga mate e peehi nei i runga i te iwi Maori i raro i nga ture mo nga whenua Maori e mana nei.

2. E tino mate ana nga iwi Maori i te mahi a te Kooti Whenua Maori me nga ture whenua Maori o naianei.

3. I te mea kei te hiahia matou kia mau ki a matou nga toenga o o matou whenua hei kainga hei oranga mo matou, na reira ka inoi matou ki to koutou Whare honore kia paahitia tetahi ture hei whakamutu i te hoko whenua Maori.

4. Me mahi he tikanga e taea ai te rihi o aua whenua, e kore hoki e tika kia takoto kau aua whenua kia waiho hei arai i te tupu haere o te koroni, a hei mate hoki mo nga iwi e rua. Na reira ka inoi atu o koutou kai-pitihana :—

(1.) Ko nga hoko katoa i nga whenua Maori me whakamutu.

(2.) E inoi ana matou, ki te mahia taua ture, me whakauru he tikanga ki roto kia whai mana ai nga Maori ki te pooti i nga mema Maori mo te Kaunihera Maori, a me whakamana taua Kaunihera hei whakahaere i o ratou whenua me nga tuku.

(3.) Me hoatu e te Karauna he whenua hei rahui mo nga Maori kore whenua kua riro nei nga whenua i te raupatu i te hoko ranei ki te Karauna.

(4.) Me whakatikatika "Te Ture Kooti Whenua Maori, 1894," a me whakamutu te Kooti Whenua Maori.

(5.) I te mea he tika kia tere te oti o tetahi ture penei me tenei e inoitia atu nei i mua o te mutunga o tenei Paremete, na reira ka inoi atu o koutou kai-pitihana ki to koutou Whare honore kia tukua mai e koutou, i runga i to koutou matauranga nui, te ora e hiahia nei, a ka inoi tonu matou.

TUPU TAINGAKAWA me Tetahi atu.

Pitihana No. 423.—Na WI PERE i tuku ki te Whare.

Ki te Honore Pika me nga Mema o te Whare o Raro o te Paremete o te
Koroni o Niu Tireni e noho huihui ana i roto i te Paremete.

Te pitihana a nga Maori e ata whakaatu ana :—

1. I te mea kei te hiahia matou kia pumau ki a matou nga toenga o matou whenua hei kainga hei oranga mo o matou iwi, na reira ka inoi matou ki to koutou Whare honore kia paahitia tetahi ture hei whakamutu i te hoko o nga whenua Maori.

2. Me mahi he tikanga e taea ai te rihi i aua whenua i te mea hoki kaore o matou hiahia kia takoto kau aua whenua, kei waiho tera hei arai i te tupu haere o te koroni, a hei mate mo nga iwi e rua.